

MALUAPAPA



Tala mai le Kolisi Faa-Faifeau i Malua / News from Malua Theological College

TALOFA LAVA!

O le mapu mai ole Ekalesia Faapotopotoga Kerisiano Samoa i lona toaiga i Maluapapa i tausaga taitasi ia Me, ose faatatau atamai a Tama ua lagomau mai i tiasa. E le gata ose tauaofiaga e soalaupule ai le faa-le-tino ma le faa-le-agaga ole Tino o Keriso, ao le avanoa foi sei toe faapaiaina ai le Ekalesia e le Agaga ole Atua. Aua foi, o le faitauga a le Ekalesia o le vaitau tonu lenei ole Agaga Paia. Ole autu o lenei Fonotele, "Faalogo ile Agaga o le Atua".



Ma'afala Limā FS
Pule o le Kolisi

Mua laia o le viigi i le Atua Tolu Tasi Paia ma ou faatalofa atu i le afio mai, susu mai, talaaao mai ma le faamaloulou mai ole Ekalesia mai ona mauga tetele seia oo i ona mau-ga iti. Talofa! Talofa lava!
Ao liuliu totoa finagalo ma saili tofa

le Ekalesia i lana Fonotele, e ao pea ona momoli le faamalo i le Taitaifono ma le Laulau ole Fonotele. Faamalo foi ile tapuaiga mau a le Komiti o Toeaina ma le nofo-a-Komiti;

ma le laveloa o Usufono filifilia.

Ao lenei lomiga ole Maluapapa, ua mo se silafia e le Ekalesia ma le aufaitau o le lotoifale o lana Kolisi Faafaifeau. Ua fia faatauaina lava foi i lenei lomiga miti a le Ekalesia ua tino mai, pei 'O Le Fale Iupeli'

Ia manuia taualumaga o le Fonotele ale Ekalesia Faapotopotoga Kerisiano Samoa; manuia foi lau faitau ma lau silasila.

Ma'afala Limā

Ma'afala Limā
PULE KOLISI MALUA

LOMIGA, E PATIPATIA AI LE MITI A LE EKALESIA UA TAUNU'U O LE FALE IUPELI



SILASILA I TOTONU

Talofa Lava! - Susuga Ma'afala Limā (FS)	1	O le Fale Iupeli	8-9
Amatalia Galuega a le Kolisi	2	Motu le Pa... cont'd	10
Tautai A'e	3	Study Center	11
Faauga Faifeau Samoa 2017	4	Malua Journal	12
Malua Bible School	5	Ripoti Eeseese mai le Kolisi	13-14
So'otaga	6	Va'aiga Eeseese	15
Motu le Pa Ua Iloa	7	Taaloga Taga Polo	16

Amatalia Galuega a le Kolisi

O le Aso Lulu, 1 Fepuari, 2017 i le itula e 7.00pm na faia ai le sauniga e tatalaina aloaia ai aoaoga ma galuega a le Kolisi mo le tausaga, ma faaofiaina ai le vasega ulufale o a'oa'o ma o latou faletua, faatasi ai ma le faiaoga fou mo le galuega i le Kolisi. O ia lea o Filemoni Crawley ma le faletua ia Alofa. O le susuga ia Crawley ua fa'auuina i lona faailoga o le Master of Theology mai le Kolisi Faafaifeau a le Pasefika (PTC) i Fiti, i lalo o le polokalame sikolasipi a le Ekalesia. O lea foi sauniga na toe faafeiloai atu ai i faiaoga ua toe taliu mai ina ua maea le taumafai i le faailoga o le Ph.D. in Theology; o i laua ia o Alesana Pala'amo ma le faletua ia Lemau, ma Imoamua Setefano ma le faletua ia Amelia. O lea sauniga na faia lava i le malumalu tapua'i o le Kolisi.

Taitai o le sauniga: Susuga Tavita Anesone FT (Taitaifono Komiti o Malua). Faitauina o le Tusi Paia & Tatalo: Susuga Tunumoso Iosia FT (Failautusi Komiti o Malua). O le tusi faitau ma le manatu autu o lea sauniga, o le faasinoga mai le Tusi Faitau Aso a le Ekalesia: Tanielu 4:19-27 "O miti ua fa'aalia, lu'i ma fofo" (*Dreams that reveal, challenge and heal*).

Na avea le a'ao fa'atalofa o i latou nei, e fai ma sui o le Komiti o Malua e talia aloa'ia ai le susuga i le faiaoga fou ma toe taliaina ai faiaoga ua toe taliu mai i le galuega: Tavita Anesone FT, Tunumoso Iosia FT, Taeipo Malifa FT, Amuia Seuala FT, Siolo Tauati FT, ma Ma'afala Limā FS (Pule Kolisi Faafaifeau Malua).

Na faaiuina lenei sauniga i se taumafataga i le Fale Mafutaga na saunia e le Kolisi i Malua. Na tauaaina ai foi e faiaoga nai meaalofo mo le mamalu sa auai. Ona lulu aao ai lea ma faatofa.

Faia'oga Toe Taliu Mai

Ua toe taliu mai nei le Susuga ia Imoa Setefanoa ma lona faletua ia Emelia, faapea foi le Susuga ia Alesana Pala'amo ma lona faletua ia Lemau, e faaauau ai tofiga fa'a-faiaoga i le Kolisi i Malua ma ua ma'ea ai a la taumafaiga i le faailoga o le Ph.D. O talia nei la'ua taumafaiga o le Ph.D.



Rev. Alesana & Lemau Palaamo

Rev. Imoa & Emelia Setefano



Faia'oga Fou

O Filemoni ma Alofa Crawley, o le Faiaoga fou o le Kolisi i Malua. Na ulufale mai i la'ua i le Kolisi le tausaga 2011. Na fa'au'uina i le faailoga o le BD i le tausaga 2014. Sa filifilia mo le sikolasipi a le Kolisi ma faamanuiaina ai i le faailoga o le MTh in Practical Theology (Distinction). Ua taliu mai nei ma tofiaina e le Komiti o Malua, e galue faa-faiaoga i le matagaluega o le Faiva Alofi-Lima o le Mataupu Silisili.

Filemoni & Alofa Crawley

The Late Rev. Eti Tamati (FT)

E LE GALO GALUEGA LELEI SA LAILOA AI

Ua mapu atu i aao o Lona matai, ae o loo olaola pea ana galuega lelei i le Ekalesia aoao, aemaise le Kolisi Faafaifeau i Malua. O le faaiuga o Aperila 2017 na tumalo ai se tasi o tama o le Ekalesia aoao, ao le tama foi o le Kolisi i Malua le susuga i le Toeaina ia Rev. Elder Eti Tamati. E manatua pea le susuga i le toeaina ona o lona sao taua i polokalame a le Kolisi e pei o le Felaugaiga a aoao i le Matagaluega a Malua i tausaga taitasi. O se tama foi sa iloga lona lagolago malos i fuafuaga aua se sootaga lelei i le va o le Kolisi ma le Matagaluega; E pei ona toe maua ai le avanoa e fai Aso Sa o le Talalelei ai le Kolisi ma le Pulega a Malua i Sisifo.

Ia faamaise le agaga o le Atua i le faletua ia Kuinimeli ma le nofoaalo faanoanoa faapea le Ekalesia ona o Lana vala'au paia i le susuga i le toeaina. Ae o se paganoa foi e momoli atu ai le faafetai a le Kolisi i le susuga i le toeaina ona o lona sao taua ma ana galuega lelei aua se manuia mo le Kolisi nei ma le lumanai. Manuia lau Malaga tama.



LA OSO: 3 Setema 1953
LA GOTO: 31 Mati 2017

E Manatua Pea Oe Le Tama

TAUTAI A'E



Eteuati Reupena (FS) & Menime



Va'alotu T. Nafō'i (FS) & Mariki

O le leo o le fiafia ma le olioli na faalogoina i le laumua i Malua i le taeao o le Aso Lulu 24 Me 2017 i le lotu faapi-toa mo le aufaigaluega ua ausia tausaga e malolo penisione ai. Aua ua ae manumalo le valaauina ma ua sao mai fita ma faigata o le soifua auaua ai i le Atua e ala i tausiga o lafu mamoe i alalafaga ma aulotu. O le sauniga sa taitaiina lava e le Taitaifono o le Fonotele, Tautiaga Senara (FT). E toa fitu i latou ua malolo penisione nei. O i latou ia o Vaalotu Malu ma Mariki Taulapapa Nafō'i (Apia i Sasae); Eteuati ma Minime Reupena (Apia); Aofaiga ma Lolo'u Levi (Kuiniselani Saute); Taihiatama Hasini (Manukau); Afiga ma Penetekoso Timuoneone (Aukilani); Milo ma Talamasinei Faaleava (Kuiniselani Saute) ma Uele Lotu ma Ane Uele (Apia i Sasae). Na vaaia le sagisagi fiafia mai o aiga, uo ma e masani, o aulotu ma le paia o le ekalesia ua aofaga potopoto i lenei aso fiafia. Ua sa'o ai le faisalamo, o le aso lava ua faia e le Alii tatou te olioli ma fiafia ai. Malo le tauata'i, ua faamalo le auaua, i le Atua ma lana Talalelei.



Milo Fa'aleava (FS) & Talamasinei

UA E SEU LE LAGATILA. UA FAAPULOU LE TUALIMA. UA MALO FAI O LE FAIVA!!!!



Afiga Timuoneone (FS) & Penetekoso



Uele Lotu Uele (FS) & Ane



Aofa'iga Levi (FS) & Lolo'u



Taihiatama Hasini(FS)

Ua A'e Malo Faiva



Rev. Dr. Latu & Lotu Latai & Iaeli

O le masina o Tesema 2016 na faauuina ai le Susuga i le Faiaoga ia Latu Latai i lona faailoga o le PhD i le Mataupu o le Talafaasolopito mai le Australian National University i Canberra Ausetalia. Sa auai ai i laua ma le faletua ia Lotu Latai faapea le Susuga i le Toeaina ia Taeipo Malifa o le Matagaluega a Niusaelese e fai ma sui o le Komiti o Malua, faapea aiga ma uo e patipatia lenei taunuuga sa fitaituga ai lenei uso a faiaoga. O Dr Latai ua toe faaauau nei le auaua faafiaoga i le Matagaluega o le Talafaasolopito o le Lotu Kerisiano i le Kolisi i Malua ma le Aoga Tusi Paia a Malua. Ua tofia foi o ia e fai ma Sooupu o le Aoga Tusi Paia a Malua. O loo ia umia foi faailoga mai le Iunivesite o Samoa (BA), Kolisi i Malua (BD), ma le MTh Distinction mai le Pacific Theological College i Fiti. E tasi lo la alo o le tamaitai o Iaeli. O le ulutala o le tusiga a Dr L. Latai e faapea, "Covenant Keepers: A History of Samoa (LMS) Missionary Wives in the Western Pacific from 1839 to 1979."



Rev. Dr. Arthur & Sina Wulf

O le masina o Me 2017 na faauuina ai foi le PhD o le Susuga i le Faiaoga ia Arthur Wulf i le Mataupu o le Feagaiga Tuai mai le Auckland University, Aukilani i Niu Sila. Sa auai ai le Faletua ia Sina Wulf, faapea le susuga i le Toeaina ia Lucky Slade e fai ma sui o le Komiti o Malua, faatasi ai ma aiga ma uo e fiafia faatasi ma le uso a faiaoga ma le faletua i lea aso fiafia. Ona o lea ua tau lau o le taumafai na tuua ai le Kolisi mo ni nai tausaga. O Dr Wulf ua toe faaauau nei le auaua faafiaoga i le Matagaluega o le Feagaiga Tuai i le Kolisi i Malua ma le Aoga Tusi Paia a Malua. O loo ia umia foi faailoga mai le Victoria University i Ueligitone Niu Sila (BA), Kolisi i Malua (BD) ma le MTh mai le Pacific Theological College i Fiti. O le ulutala o le tusiga a Dr A. Wulf e faapea, "Was the Earth Created Good? Reappraising Earth in Genesis 1:1-2:4a from a Samoan Gafataulima Perspective."

Faau'uga Faifeau (FS)

E tumua le faafetai i le Atua ona o lona alofa ua mafai ai; O le lagona lea na oo ifo i finagalo ma loto o susuga i Faifeau ma o latou faletua, ina ua faaeeina aao ma faamanuia i ai Tama o le Ekalesia i le Fale Iupeli fou i le Aso Toonai 20 Me. O lagona o le fialia i matua ma aiga, o aulotu, faapea Matagaluega, ae a le Ekalesia aoao ina ua faauuina fau talosia aua sauniga paia o le Faamanatuga ma le Papatisoaga.

I le Faauuga o lenei tausaga 2017, e toa sefulutolu (13) faifeau ma faletua na faau'uina ai;

Aokuso Lee & Aiga (*Matagaluega a Apia*),
Alaifetu Faaeteete & Kalala (*Matagaluega a Vitoria*),
Brian Kolia & Tanaria (*Kolisi Malua*),
Enoka Aperamo & Susi (*Matagaluega a Falealili-Safata-Siumu*),
Epati Sooula & Vickie (*Matagaluega a Apia*),
Hector Panama Pouono & Herem (*Kolisi Malua*),
Henry Ito & Orepa (*Matagaluega a Kuiniselani*),
Ionatana Te'o & Vaito'a (*Matagaluega a Falealili-Safata-Siumu*),
Leiofi Upu & Faalili (*Matagaluega a Niu Sila i Saute*),
Letupu Matautia & Helen (*Matagaluega a Apia*),
Petelo Matelani Puga & Angela (*Matagaluega a Apia i Sasa'e*),
Sam Faala Amosa & Sapi (*Matagaluega a Niusauelese*),
Semikueva Ugapo & Vesia (*Matagaluega a Apia i Sasa'e*).


Avea lenei avanoa e momoli ai le faafetai ma le faamalo a le Maluapapa ia outou susuga i faafeagaiga ma faletua, aemaise a oulua susuga i faifeau faiaoga Brian Kolia ma Hector Panama Pouono ma o oulua faletua i le onosai ma le faapalepale ao feagai ai ma luitau o le taumafai, aua o lea ua tini taunuu le faamoemoe. Faafoi faatasi ai lava lea o le viiga ma le faafetai i le Atua soifua ona o mea silisili ua ia faia mo i tatou. Manuia le laasaga fou o le soifua auauna i le Atua ma Lana Talalelei.



Panama Pouono (FS) & Herema



Brian Fiu Kolia (FS) & Tanaria



Tusi mo le Su'ega Ulufale

Feagaiga Tuai (OT): Kenese

Feagaiga Fou (NT): Mareko

Malua Bible School

E fiafia lava e tuuina atu se lipoti o le Aoga Tusi Paia a Malua i lenei tausaga 2017. Sa amataina i le manuia polokalame o le aoga Tusi Paia a Malua i le Aso 13 Fepuari. Mo le silafia i le aufaitau, o le tausaga na tea nei na amataina ai le Aoga Tusi Paia i le motu o Savaii, ma ua lua ai nei lala o le tatou aoga. O Upolu nei ua faatinoina lava i Apia i le Ioane Viliamu i Tamaligi, ao Salafai o le Aoga Matataeseese a le EFKS i Salelologa. O aoga i Apia e faia lea i afiafi o Aso o le vaiaso, ao Savaii e faia lea i afiafi o Aso Faraile ma taeao o Aso Toonai. I le taimi nei o loo agai atu lava Susuga i Faiaoga a le Kolisi i Salafai e faatinoina ia vasega.

O se tulaga fiafia ona o le siitia o le numera o Alii ma Tamaitai aoga o lenei tausaga. Ua tulai mai ai se tuuaofaiga o le aoga i le 125; e toa 63 i Apia ma le 62 i Salelologa. O i latou o loo aoaoina i lenei aoga e aofia ai le autalavou ua maea aoaoga mauualuluga, seia oo lava i tagata faigaluega, ma i latou ua malolo mai galuega. Vaaia lava ma le fiafia le iai foi o Aoao Fesoasoani, Tiakono, Faletua o Faafeagaiga, Faletua o Aoao ma Tiakono ma tagatalotu eseese. O se tasi lava o mea ua matauina i lenei tausaga o le auai ai o i latou mai isi Ekalesia o loo ua aoaoina ai. O le tausaga nei foi sa faauuina ai se tasi o sui mai le Ekalesia Aso Fitu i le Tusi Pasi o le Mataupu Silisili. O se vaaiga taua lea i se tasi o miti o lenei aoga ina ia avea o se aoga mo soo se tasi e moomia le aoaoina i le Tusi Paia.

O se tasi o laasaga taua foi o le Aoga i lenei tausaga o le faatinoina lea o le Faauuga lona VII a le Aoga Tusi Paia talu ona amataina i le tausaga e 2007. O lenei tausaga e toa 14 i latou sa faamanuiaina i le Certificate in Theological Studies; ae toa 8 sa faamanuiaina i le Diploma in Theological Studies, e aofia ai le Faletua o le Aoao Fesoasoani ua maluu o Peseta Margaret Malua. O lea e momoli atu ai le faamalo i le Aufaauu o lenei tausaga. Faamalo le taupati!

O le faatinoga o le Aoga i Savaii o se tasi lea o vaega taua ua mafai ona ausia ona o le lagolago a le Matagaluega a Faasaleleaga, Susuga i Toeaiina, faapea le nofo-a-Faafeagaiga i alalafaga o le Matagaluega. Faafetai ona o le tausiga o Susuga i Faiaoga o le Kolisi e autovaa atu i lea vaiaso ma lea vaiaso. E fia faailoa foi le agaga faafetai ona o le lagolago tele a le Susuga i le Pule o le Aoga Matata-eseese, Afioa Namulauulu aemaise le Aufaigaluega ona o le tali leleia o Susuga o Faiaoga i la latou tautua i vaiaso taitasi.

E iai le manatu o loo sologa manuia foi polokalame a lenei aoga ona o le tele o le lagolago a le Susuga i le Pule o le Kolisi, Susuga Maafala Lima, ae tainane le Suipule ma le auuso a Faiaoga. O le faatinoga lava o lenei aoga e faamoemoe lava i la latou faatofalaiga ma tapenaga a i latou i aso taitasi. Faamalo faafetai. E momoli foi le faafetai tele i le Susuga i le Failautusi Aoao faapea le Susuga i le Teutupe Aoao ona o le lagolagoina o lenei aoga, e le gata o nofoaga o loo faatinoina ai lenei aoga ae faapea foi tupe e talosagaina mo le faatinoina o lenei aoga.

E momoli foi le agaga o le Faafetai tele i le lagolago o le Komiti o Malua, i Tama o le Ekalesia, aemaise o la latou tapuaiga malu i le faagasologa o polokalame o lenei aoga.

Ia manuia tele le Ekalesia aemaise le feagai ai ma lana Fonotele o lenei tausaga. Faatasi mai foi le Atua i le faaauuina i ana galuega o lenei tausaga.

Soifua ma ia manuia.

Latu Latai (Sooupu o le Aoga Tusi Paia)



Certificate in Theological Studies

Elita Tooala
Faavaoga Talalelei Aoelua
Lefau Sooalo Faafetai Apelu
Lotu Salesulu Latai
Mile Nofaiga
Peiosei'aemoemaugaoleatuolo Doreen F. Sagaga
Peseta Malelega Tuisalega
Sailimalo Makerita Eteuati
Samoa Loau Tavita Talapusi Tuisila
Sarai Sititi Misa
Silaumua Konelio Faiilagi
Solotetee Toalepai
Uialatea Iosua
Tauaovao Teveli Lefulefu Mosetele



Diploma in Theological Studies

Faauga Mulitalo
Irene Minime Ete Reupena
Lealali Mapuonā Mulitalo
Nanai T. T. S. P. Fatialofa
Peseta Margaret Malua (*Ua maliu*)
Samoa Loau Tavita Talapusi Tuisila
Sarai Sititi Misa
Tusa Misi Tupuola

So'otaga - Piula, Kanana Fou & Malua

O le aso Faraile 21 Aperila 2017, na faataunuaina ai le sootaga a Kolisi Faafaifeau a Kanana Fou, Piula ma Malua. O le manatu autu sa faatauaina i lea aso, "Faamaninoina o le nunumi (*Sorting out the mess*)", o le manatu autu o le aso Faraile 21 Aperila 2017 o loo faataoto mai i le Tusi Faitau Aso a le EFKS 2017.

E tasi le aso o lenei mafutaga lea sa talimalo ai le Kolisi Faafaifeau I Malua. Na amataina lenei faamoemoe i le sauniga lotu na taitai'ina e le Kolisi Faafaifeau i Malua. O le saunoaga autu, na saunoa iai le Peresetene o le Ekalesia Metotisi Samoa, Susuga Apineru Lafai. Sa agai le saunoaga a le Peresetene i le manatu autu o le aso, ae taualuga i le faamalosiua ma fautuaga faa-Tamā mo Kolisi Faafaifeau uma e tolu (3). O le Susuga Arthur Wulf na saunoa e fai ma sui o le mafutaga e faafetaia le saunoaga autu o le aso, ma faaleo le agaga fiafia o le mafutaga faapea faaaloaloga masani.

Sa felanulanuai lea aso i togiga faapea le laufofoga fiafia i taimi o faasoa faamataupu silisili ma taimi o taumafataga. Na vavae foe o le aso i taaloga soka ma lakapi mo aoao, faapea le voli polo mo faletua. O le faamoemoe o taaloga, o le u'unaia lea o le soifua maloloina o le tino ina ia fesootai lelei ma le mafaufau faapea aoaoga faaleagaga.

O le maea o le taumafataga o le afiafi na alo ai loa le Kolisi Faafaifeau a Kanana Fou i ana faafiafiaga suifefiloi aua lava le mafutaga. Na taualuga le mafutaga i le sauniga lotu na taitaia e Kanana Fou e toe faafoi ai le viiga ma le faafetai i le Atua, ona ua iu ma le manuia fuafuaga o le mafutaga i lona alofa tunoa. O le Susuga Maafala Limā na saunoa e fai ma sui o Pule o Kolisi Faafaifeau e tolu e tapunia aloaia le mafutaga, ma faamanuia i fuafuaga ma polokalame a Kolisi Faafaifeau o le a feagai ai i lenei tausaga. E iai le faamoemoe o le a faaauauina lenei mafutaga i le lumanai, aua lava le faamasani o le au-faigaluega faalioli o le talalelei, faapea le faasoa ai o taleni ma agavaa. Ia viia pea le Atua. i le ola mafuta o lana fanau.

Filemoni Crawley (Sui Komiti Mafutaga)



Fa'amuli o le Eseta, Tausaga Muamua

O sina tala otooto o le faamuli sa feagai ma le Tausaga Muamua i le Eseta. O le susuga i le faiaoga ia Filemoni ma le faletua ia Alofa Crawley, na feagai ma le taitaiina o lenei faamuli. O se vaaiga e le masani ai lenei vasega ona o se taimi muamua lenei ua tuua ai na o matou. O se faiga lava ua talafeagai, aua o i e amata ai ona iloa e le aoao le faiga o le faamuli, aemaise o le a mautu ai foi ma le mafutaga faalevasega.

O se faamuli e fai mea fiafia tagata uma. O le vaaia o le nuu i le ao faapea leoleoga o le po. O le faamaina o le fanua ma le fagagaina o le lafu i le afiafi. A oo foi i le taimi e kuka ma gasese ai taumafa, e tofu le tagata ia ma lana matafaioi e fai, o nisi sa feagai ma le faiga o suavai poo saka, a o faletua lava ia faatasi ai ma le fesoasoani a le faletua ia Alofa, sa gafa ma le gaseseina o mea lelei (supo, falai etc).

O le sauniga o le Aso Maliu, na taitaiina e le susuga i le Tama Pule ia Maafala Lima. Sa fesoasoani ai sui o la matou vasega e ala i le faitauina o le Tusi Paia ma le faaleoina o talosaga. O le sauniga o le Aso Sa Toetu na faapea foi ona taitaiina e le Tama Pule. Na sosoo ai loa lea ma le toonai tele na saunia lava e la matou vasega, faatasi ai ma le faitoonai a nisi o faiaoga. O se toonai matagofie ma le manaia, aua sa aofia uma ai le Tama Pule ma le Faletua, faapea susuga i faiaoga, faletua ma fanau. A o se mitamitaga foi lea i la matou vasega ona o se mea muamua lea ua matou faatinoina i totonu o le Kolisi. Na iu i le manuia mea uma ina ua saunoa faafetai le Tama Pule e tusa ai ma lea aso.

O le Aso Gafua o le aso mulimuli lea sa faia ai se BBQ e faauma aloaia ai la matou faamuli. Na tali faatasi ai foi ma taaloga sa feagai ai ma Faiaoga ma o latou faletua i lea aso. Avea ai lenei avanoa e momoli ai le faafetai i le susuga i le faiaoga ia Filemoni ma le faletua ia Alofa ona o lo la sao taua, aemaise o le faatautaia o lenei faamuli. Ua matou manatu ua lava sina iloa i le faatinoga o faamuli e amata ai le ola faafaamuli ao aotauina ai i lenei aai. E viia ma faafetaia ai le alofa o le Atua ona o lona faatasi mai ua mafai ai ona faataunuaina ai lenei faamoemoe i le manuia.

Mauola Taito



Motu le Pa Ua Iloa

Fonotaga a le OBSA 2017

O le aso 21 ma le 22 Aperila, 2017 sa faataunuaina ai le fono lona ono a le Oceanic Biblical Studies Association (OBSA) i le Aoga Faafaifeau a le Trinity Theological College i Aukilani Niu Sila. O fono a lenei faalapopotoga e ta'i lua tausaga ma faia. E faasolo lava fonotaga i atunuu o le Pasefika o iai aoga faafaifeau o loo auai i lenei fono. O le autu o nei fonotaga o le faalauiloina lava lea o le faitauga o le Tusi Paia mai le vaai poo le faauigaga faa atumotu pe Pasefika foi. O le manatu autu o le fonotaga lenei, "reCharge, reChart and reChance". O le auga o lea manatu autu o le toe silasila i le tunanai, taimi nei, ma le lumanai i galuega aemaise galuega fia faaauau ma faaleleia i le susesueina o le Tusi Paia i le vaai faa-Pasefika. O le tele lava o faiaoga ma sui aoga mai Iunivesite ma Aoga Faa-faifeau a le Pasefika faapea ai Ausetalia ma Niu Sila na auai ai i lenei fonotaga.

Sa auai ai faiaoga ma sui o le Kolisi i Malua ma la saunia ai foi ni pepa mo lea faamoe-moe. Dr Vaitusi Nofoaiga – *Occupation as blessing – An intertextual reading of Matt 2:1-12 and Num 24:14-19 from Mavaega nai Tulafasa (Farewell covenant in Tulafasa)* ma Makesi Neemia – *God's sovereignty and Land Tenure in Contemporary Samoa*. O le maea ai o le fonotaga sa filifilia ai le susuga a Dr Vaitusi Nofoaiga e avea ma failautusi o lenei faalapopotoga. O le fonotaga e sosoo ai o le a faia lea i Suva, Fiti i le 2019.



Faalauaitelaina o le silafia

O le maea ai o le vaituuaga muamua o le tausaga nei sa faamavae atu ai le Susuga i le Alii Pule ma le Faletua, le Kolisi atoa i le Faiaoga ia Visesio Saga, le faletua ia Analeta ma le fanau. O le susuga ia Visesio Saga o le a faaauauina le faalauaitelaina o le silafia i le Feagaiga Fou i le faailoga o le PhD i le Iunivesite o le MCD University of Divinity i Melephone Ausetalia. O loo fufua latou te tuua Samoa i le amataga o Iuni mo lenei faamoemoe taua. Ua tuua e lenei auauna ma le aiga le Kolisi ma faamanuiaga e le gata mai Tama o le Ekalesia e ala i lana Komiti o Malua ae faapea ai foi mai le Kolisi e ala i le Tama Pule ma le Faletua, Aiga Faiaoga ma Faletua, faapea le Kolisi atoa i Aoao ma Faletua. Manuia tele le faamoemoe ma ia feiloai i se aso oi luma i le manuia o le Atua.



Gymnasium a le Kolisi

Ua tauaoina e le Kolisi ni masini faamalositino mo lana Gym mai le Vasega Lagolago (Tausaga Tolu) 2017. O lenei meaalofo sa auina mai i Amerika e ala i se foai na tauala ane ia Faamati Aumua Winey. O lenei tamaitai e puleaina ni fale faamalositino e ta'ua o le Snap Fitness i Minnesota, USA ma e lelei la latou sootaga ma le vasega Tausaga Tolu. O le faatinoina o le momoliina mai i Samoa o lenei foai sa feagai lava ma le Tausaga Lagolago. O nei masini faamalositino e tele lava i masini faaonapo nei. O se fiafiaga tele i le Alii Pule ma le Kolisi ona ua leva ona iai le fale mo nei ituaiga faamalositino, ao lenei faatoa atoa ona totoga e tatau ai. O le autu o lenei meaalofo, ia le gata ia malosi le mafaufau ma le agaga, ae tatau foi ona faatupu maso o le tino mo faifeau ma faletua faaolioli o le Talalelei. Ina ia atoa le malosi aua le auaunaga mo le Atua ma lana Talalelei o faatalitali mai. Faafetai lava i le Tausaga Lagolago mo lenei meaalofo taua.

Aoao Sikolasipi

O lenei tausaga ua molimauina ai le faatuputupulaia o Aoao auina mai atumotu o le Pasefika e aoaoina i le Kolisi. O lenei tausaga, o loo iai lava Aoao e toalua mai Kiribati (Toantemam Ueanteiti ma Wanikaie Wanikaie) o loo i le Tausaga Fa e tau faauma ai lo la taumafai i le Bachelor of Divinity. O loo faapea foi ona iai le sui mai Tuvalu (Fiafiaga Lusama) i le Tausaga Fa o loo galue mo lona Bachelor of Theology. O le tausaga nei ua ofi mai ai foi isi sui fou i le Tausaga Muamua. E toalua mai Toelau (Ken Titi ma le faletua o Temisa ma Maka Galuega) faapea ma le toalua mai Tuvalu (Moeava Mausali ma Peniata Laulau). O loo molimauina le fiafia o nei uso ma tuafafine i le agaiga o lo latou taumafai aemaise ai foi le tulaga o loo faatinoina ai le tapenaina o le aufaigaluega faaolioli a le Atua i le Kolisi i Malua.

O LE FAL

Fa'aulufaleina Malumalu o le Ekalesia F

Na faaulufaleina le uluai Fale Iupeli i le tausaga 1897, e faamanatuina ai le 50 tausaga o le Kolisi Faafaifeau i Malua (1844-1894).

I se taimi i le va o le 1897 ma le tausaga 1910, na toe faafouina ai le Fale Iupeli, i lona tulaga e oo mai i le tatalaina i lalo i le tausaga 2013, o i ai pea lava.

O le tele o vaega o le Fale Iupeli tuai, e aofia ai ma le pulelaa, sa toe faaogaina e le Kolisi e fausia ai le Fale Iupeli II, i le itu sasa'e o le Fale Mafutaga.




Ae o le tausaga nei, 18 Me 2017, ona o le Alofa Tunoa o le Atua Silisili, e tusa ma le 120 tausaga talu ona faatuina le Fale Iupeli I, ua taunuu ai le faamoemoe na moe miti i ai le Ekalesia, i le faaulufaleina o le Fale Iupeli III, i le tulaga sa i ai le Fale Iupeli I. Ia viia ai pea le Alofa o le Atua, i le i'u manuia o lenei galuega mata-gofie.

"Ou te aumaia i latou lava i lo'u mauga paia, ma a'u faqfiafia ia te i latou i lo'u fale tatalo ... aua e ta'ua lo'u fale o le fale tatalo mo nuu uma." (Isaia 56:7)

Iupeli Tuai



Tu'uina I lalo le Iupeli Tuai




Faapa'iaina o le Eleele mo le Fale Iupeli



E IUPELI a'apotopotoga Kerisiano Samoa i Malua

Amata Galuega O Le Fale Iupeli



Fausiaina Malumalu Tapua'i o le Kolisi (Iupeli II)



Usofono Malua Fonotele

O le susuga ia Rev. Dr Latu Latai o le sui usufono lea a le Kolisi i lenei tausaga i lana Fonotele. O Latai, o le faiaoga o le Talafaasolopito o le Ekalesia Kerisiano ma o ia foi o le Sooupu o le Aoga Tusi Paia a Malua, Sa ia saunia foi le pepa, e fai ma sui o le Kolisi, i le aso muamua o le Fonotelele o lenei tausaga. O lenei pepa ua faaulutalaina, “Faalogo i le Agaga o le Atua: O le Galuega Faamisionare a Faifeau ma Faletua LMS Samoa i le Pasefika 1839-1979.”

SPATS Workshop

SPATS WORKSHOP ON CAPACITY BUILDING FOR LECTURERS AND CURRICULUM DESIGNERS OF MALUA, KANANA FOU AND PIULA

O lenei fonotaga sa faatinoina i le aso 18 ma le 19, Aperila 2017 i le laumua o le Kolisi Faafaifeau i Piula. Sa faatautaia e sui o le SPATS e aofia ai Viliame Rabici mai Fiti, Afereti Uili mai Samoa ma Mosese Mailo o le Alii Pule o le Kolisi i Piula. Sa faapea foi ona fesoasoani iai le Sui Pule o le Kolisi i Malua, Alesana Eteuati i le faatautaiga o lenei lava polokalame. O le auga ma le sini maua i le fesoasoani i susuga i faiaoga o Kolisi taitasi ia latou tapenaga o vasega, i mataupu ma le aoaoina o ia mataupu. Faapea ai foi le makaina ma le togiina o galuega ma suega a aoao. O se fonotaga taua e le gata o mea ua aoaoina ai ae ua mafanafana atili ai le mafutaga a le aufaigaluega mai nei Kolisi Faafaifeau e tolu. Sa faaiiina lenei mafutaga i Malua i le Sootaga a nei Kolisi Faafaifeau sa faia ai.

CWM Colloquium

CWM COLLOQUIUM ON NEW INTERNATIONAL FINANCIAL AND ECONOMIC ARCHITECTURE: ECONOMY OF LIFE-ADDRESSING POVERTY AND ECOLOGICAL DESTRUCTION IN PACIFIC

O lenei fonotaga sa faia i Suva, Fiti i le aso 14-18 Mati 2017. O le fonotaga i lalo o le faamalu a le FGFL (CWM) i le itulagi o le Pasefika. Lea e aofia ai Samoa, Fiti, Tuvalu, Kiribati, Nauru, o le atu Solomona, Papua Niu Kini, Tahiti, o Niu Kaletonia, Tokelau, Niue, ma isi. O le susuga ia Dr Faalepo Tuisuga na fai ma sui o Malua i le aumalaga a le EFKS mo lea faamoemoe. E aofia ai i le aumalaga, Rev. Rimoni Wright (Teutupe EFKS), Tiaoali'i Tofaeono (*Mission Officer*), ma Sivailoa Ava'ia Perefoti (Faletua o le Faifeau).

O le auga autu o lenei fonotaga o le faatalatalanoaina lea o auala e tau foia ai faafitauli o feagai ma tagata lotu o atumotu, e pei o le mativa ma le lelei o le faasoaina o tupe ma le tamaoiga o le atunuu, le faailoga lanu ma le faailoga tagata, etc. Aemaise le oia o le siosiomaga ma le foafoaga ona o suiga ogaoga o le tau.

O le fonotaga lava lenei na faataatia ai se faavaa o galuega fuafuaina mo Ekalesia uma na auai ina ia taiala ai a latou faatinoga e tau foia ai faafitauli e pei ona taua i luga.

Member Mission Forum

O lenei fonotaga sa faia i Nadi, Fiti mai le aso 2 i le aso 4 o Me 2017. O le fonotaga sa tuufaatasia e le FGFL (CWM) mo sui o loo i le Pasefika. E toatolu sui o le EFKS sa auai ai i lea fonotaga e aofia ai ma le Sui Pule o le Kolisi, Alesana Eteuati (FS). O isi sui o le EFKS e aofia ai le Failautusi Aoao o le EFKS, Vavatau Taufao (FS) ma Silaumua Konelio (sui autalavou).

Faaipoipoga

O le Aso To'ona'i Aso 7 o Ianuari 2017, na fa'apa'iaina ai le tu'ufa'atasiga o le ugali'i fou i le susuga i le a'oa'o ia Challis Pupi ma lona faletua ia Saraneta Iakina e ala i le fa'aipoipoga. O lea aso fiafia o le a'oa'o ma lona faletua na molimauina e le gata i le pa'ia i aiga na lua, uo ma e masani ae fa'apea ma le Kolisi i Malua. Tau ina fa'amanuia tele le Atua i le aiga fou, ae silisili ai ona fa'aaogaina e le Atua ma lana galuega.



Ephesian 4:2
Whoever lives in love lives in God, and God in them.

Auai Le Kolisi I le Tuumalo o le Tuua o le Alii Pule

Rest in peace, Tuliaupupu Pala Lima!



O le vaituuaga muamua sa lagonaina ai le faanoanoa i le Kolisi ona o le tuua ai o le malo, e le tuua o le Alii Pule, o le afioga i le Fofoga o le Alataua, Tuliaupupu Pala Lima. O se tasi o tama sa faanonomanu ao alo faiva le Alii Pule ma le Kolisi i ana galuega i lea tausaga ma lea tausaga. Sa faatinoina lava e le Kolisi lana galuega faamafanafana i le Alii Pule ma le aiga, ao feagai ai ma ia aso faigata. Na amata mai lava i le aso na taunuu mai ai i fanua le sa o le tama mai Niu Sila le galuega faamafanafana e ala i le auai ai o le Sui Pule ma le Kolisi seia taunuu i Letogo le molimoliina o le sa i lea aso. Sa faaauau le galuega faamafanafana e ala i se sauniga lotu faapitoa a le Kolisi ma le aiga i le Maota Maliu o

Sefo Pa'u. O lea sauniga sa taitaiina lava e faiaoga ae peseina viiga e le aufaipese a le Kolisi. O le taitai o le sauniga o Dr Taipisia Leilua, sa ia saunia foi le upu faalaeiau, ae fesoasoani iai Olive Samuelu (Faitauina o le Tusi Paia) ma Imoa Setefano (Talosaga). Sa faaauau pea faamafanafanaga a le Kolisi e ala i le leo na taitaiina e Dr Faalepo Tuisuga. O le toe sauniga o le tama sa auai foi le Kolisi i le Sui Pule ma le faletua, faiaoga ma faletua, faapea ai le aufaipese faapitoa a aoao ma faletua. Na lagiina ai e le Kolisi pese e lua o le sauniga mulimuli. O le susuga lava i le Alii Pule, Maafala Lima sa ia faia le molimau a alo ma fanau. O se aso tele ma matagofie toe sauniga o Tuliaupupu. Sa toatele foi malo taua mai le lio o le ekalesia, malo, aufaipisinisi, uo ma e masani, le itumalo ma le afioga o Letogo sa faapea ona auai ai. Sa faapea foi ona faaalua le agaga faafetai o le aiga ia latou faaaloaloga masani i e uma na auai ai. Na afea ai foi le Kolisi i ia faaaloaloga maua luga a le aiga. O le tatalo a le Sui Pule ma le Kolisi ia faapea ona iai se sao o le faamafanafanaga na tuuina atu i le Alii Pule ma le faletua, nofo i alo, ma le aiga ina ia tafiesea ai le ao pogisa na ufitia ai le aiga.

Study Center

O se vaaiaga lautele mai le tausaga na tuana'i atu nei, ua molimauina ai le alualu pea i luma o le taumafai o alo ma fanau a Malua ia a latou taumafaiga i le aoga. E manatu, e taua lava le galulue faatasi o fanau e tupulaga ma tutusa vasega i le faalauteleina o lo latou iloa. Ae le gata i lea, e alualu ai foi i luma le ola fesootea o fanau. Aua e tele ina talanoa ma fefaasoai ia latou mataupu o loo ave i aoga.

Ina ua amata lenei faamoemoe i le 2015, sa toatele tamaiti e lei matuai lelei lo latou taumafai. E moni lava e pasi ae le maua luga tele. Ao nai tausaga na sosoo ai, ua le gata e pasi ae ua maua togi maua luga. O se tala e faafiafiaina ai pea le taumafaiga a le Study Centre ona o se tasi o alo ma fanau sa Year 13 i le tausaga 2016 ua ofi sa'o atu nei i le tausaga muamua o lana BA i se Iunivesite i Niu Sila. Ua faaalua ai le agaga faafetai o matua ona o le fesoasoani tele a le Study Centre i le taumafai a lo la alo.

E pei ona faailoa pea i lenei pepa, le faamanuiaina o alo ma fanau a Malua ona o le toatele o faiaoga o loo iai agavaa ma le iloa e fesoasoani ia latou meaaoga. O le taimi nei, pe a ma le 50 faiaoga e mafai ona fesoasoani i fanau i kuata taitasi. E le gata i aoao ma faletua, ao nisi foi o faiaoga ma o latou faletua. Ao loo fesoasoani tele foi alo matutua o le Tama Pule ma nisi o faiaoga i lenei lava taumafaiga.

E ui ina sa faamavae atu foi i le toatele o faaiuso ma faletua o le 2016 sa fesoasoani i lenei Study Centre, ae ua faapoopo mai foi nisi sui fou mai le vasega Tausaga Muamua 2017. O lona uiga, e le o faaletonu lava le Study Centre i le itu tau faiaoga.

E le uma pea le agaga faafetai i le Tama Pule ma le Faletua, o taitai o lenei Study Centre, i lo la lago-lago malosi, ae maise o le faaauauina o le avanoa ua tuuina mo fanau e suesue ai i le Study Centre a Malua i tausaga taitasi. Aemaise ai foi le faaavanoaina o Aoao ma Faletua e fesoasoani i lenei faamoemoe. Ua sologa manuia ai pea le agaiga o lenei taumafaiga ona o la oulua taitaiga.

Ao agai atu foi i taimi o suega a fanau i le afa o lenei tausaga, e tatalo pea ina ia alofagia e le Atua nai fanau, ina ia tumau ai pea i le tulaga ua faataatia mo a latou suesuega. Ma ia latou faaagaina ma faatautaina ai pea lenei auunaga e fesoasoani tele mo latou.

O le tusiga o lenei tausaga 2017 ua mafai ona tuufaatasia ai nisi o pepa na saunia e faiaoga o le Kolisi Faafaifeau i Malua sa faalauiloaina i le Mafutaga Faafouina a Faifeau ma Aoao tausinu i le masina o Aokuso 2016. O le lona lima ai lenei o tusiga o le Journal. E tamaoaiga lava lenei tusi i suesuega o le Tusi Paia (Feagaiga Tuai & Feagaiga Fou), Mataupu silisili, Talafaasolopito o le Ekalesia, ma suesuega i le Galuega Faafaifeau ma le Misiona a le EFKS i Samoa nei ma atunuu e mamao. O loo i ai foi ma le pepa na saunia e le Usufono a le Kolisi mo le Fono Tele 2016, e faapea foi le pepa i le gagana faaperetania na saunia e se tasi o faiaoga o le Kolisi na faalauiloa i le fono a le *Oceania Biblical Studies Association* (OBSA) i le Kolisi Piula 2016.

O lenei 'oa faale agaga ua saunia lava ma le faamoemoe o le a fai ma sao o le Kolisi i le soifua sailiili faale agaga o le Ekalesia ma tagata lolotu e mafaufau atili ai pea i le galuega faaola a Iesu Keriso mo lana ekalesia.

O nisi o Mataupu I totonu o le Malua Journal 2017:

*Faitauga O Le Isaia 56:1-8 Ma Le Ata Tifaga O Le Tulafale'
O le Elelee ma Aia Tatau - eunuka, tagata 'ese, nofotane ma taulealea.
Makesi Neemia (FS).....p8

E Amioletonu Ae Togafiti Poto: Luka 16:8a Ua vivi'i atu le Alii i le auauna amioletonu, auā ua na togafiti poto.
Alesana Eteuati (FS).....p29

Tautuaileva As A Relational Hermeneutic To Explore The Bible About Issues Affecting Local People.
Dr Vaitusi Nofoa'iga (FS).....p46

O Fea E Te Sau Ai, A O Fea E Te Alu I Ai? O Le Va'a O Salelesi Ma Le Malaga A Le Tagata Lē Āmana'ia.
Dr Tavita Maliko (FS).....p73

O Iesu E Lē O Se Samoa Po'o Se Palagi: O Se Tala I Le Galuega Fa'amisionare A Faifeau LMS Ma O Latou Faletua I Papua Niu Kini (1883 - 1979).
Dr. Latu Latai (FS).....p92

'Su'esu'ega I Aulotu' Ma Le Galuega Fa'afaifeau A Le EFKS. (Congregational Studies and EFKS Pastoral Theology).
Dr Faalepo Tuisuga (FS).....p119

Library

E le faaitiitia le agaga faafetai tele i le Atua. Aua o lo'o mātauinā lava le sologa lelei ma le faatuputupulā'ia o tusi mo le faletusi a le Kolisi. I le kuata muamua lava o lenei tausaga, sa taunu'u mai ai tusi fou e 46 ina ia oa atili ai tusi-tusiga ma su'esu'ega a a'oa'o ma faletua.

E le gata i lea, e tusa ai ma le i'uga a le Tamā Pule ma le aiga faiaoga, o lea ua mafai ona fai su'esu'ega a faiaoga, a'oa'o ma faletua i luga o se tasi o *online Journal database* iloga, e ta'ua o le ATLA. O le aoga o lea *database*, ina ia feasoasoani tele i mafaufauga ma mataupu silisili faa'su'esu'e, e tau i le Tusi Pa'ia i nei ona po.

O lea fo'i ua fa'aaogaina auaunaga fa'a-ebook reading, aua lava le fa'alau'iteleina o su'esu'ega mo a'oa'o ma faletua i totonu o le tatou faletusi.

AF

MALUA
JOURNAL



Fifth Edition - Issue 1, May 2017

The screenshot shows a search results page from the ATLA Religion Database. The search query is 'intertextuality and the bible'. The results are displayed in a list format with the following entries:

- Bibla e intertextualidad: una aproximación**
By Milán, Fernando. Source: *Scripta Theologiae*, 40 no 2 Aug 2016, p 357-376. Publication Type: Article.
PDF Full Text (77 kb)
- Echoes of Sodom and Gomorrah on the Day of the Lord: intertextuality and tradition in 2 Peter 3:7-13**
By Jock, Ryan P. Source: *Bulletin for Biblical Research*, 24 no 2 2014, p 227-245. Publication Type: Article.
PDF Full Text (542 kb)
- Intertextuality, inner-biblical exegesis, and inner-biblical allusion: the ethics of a methodology**
By Miles, Gary E. (Gary Eugene). Source: *Bibliotheca sacra*, 170 no 675 Jul.-Sep 2013, p 326-333. Publication Type: Article.
PDF Full Text (154 kb)
- Intertextuality and the portrayal of Jeremiah the prophet**
By Miles, Gary E. (Gary Eugene). Source: *Bibliotheca sacra*, 170 no 675 Jul.-Sep 2013, p 326-333. Publication Type: Article.
PDF Full Text (154 kb)
- A political reading of Luke 1:51-52 and 3:8-9 in the light of Ezekiel 17--inspired by John Howard Yoder and a poststructural intertextuality**
By Miley, Matt. Source: *Nederlandsche Bijbelsche Tijdschrift*, 47 no 1 2013, p 25-45. Publication Type: Article.

Aoga Aso Sa & Polokalame Eseta

Na amatalia galuega a le A'oga Aso Sa i le Aso Sa 12 o Fepuari 2017. O le aufaigaluega o faaiuso e to'aiva ma faletua o fa'a'iuaso e to'avalu, faatasi ai ma faletua o faia'oga e toasefulu. O le faletua o le Tāmā faifeau ia Lalokava Limā, Alofa Crawley, Ramona Leilua, Winona Fasavalu, Maria Samuelu, Lile Niulesa, Elena Petaia, Mileneta Nofoaiga, Lemau Pala'amo, ma Neda Puaina.

O le aofai o tamaiti e 96. O po o Aso Faraile ta'itasi e faatasi ai faiaoga o vasega ta'itasi, e tapena ai mataupu mo le Aso Sa. O Aso To'onai ta'itasi i le itula e 1pm e faatino ai tapenaga i le fale mafutaga mo vasega uma, ina ia mautinoa e le Tama Faifeau ua lelei tapenaga a le faiaoga mo fanau i le Aso Sa. Sa faatino'ina foi le tala mo le Aso Maliu. O faaevagelia na faatino e le vasega matutua ma le vasega matutua faapitoa. O le tala na faatino'ina e le vasega faai'uso, A'oa'o ma Faletua.

O le autu o le Aso Maliu i lenei tausaga "Ua toe Soifua Iesu."

O le Agaga faafetai i le Atua ona o galuega lelei sa mafai ona faatino'ina i lenei kuata. E momoli ai le fa'amalo ma le faafetai i le Tāmā Faifeau ma le Faletua, i lo la'ua sao ta'ua mo le fa'afaileleina o fanau i le Upu a le Atua. Faafetai foi i Faletua o faiaoga i le tēle o lo latou taimi faa'alu i le tapenaina o fesoasoani mo fanau.

Fa'amalo i A'oa'o ma Faletua o Fa'aiu'aso sa feagai ma le galuega Faiaoga Aso Sa i lenei kuata.

O mea ua lelei, ia fai ma vi'iga o le Atua. O mea foi ua le oo i ai so tatou iloa ma so tatou malos, ia faamagalo mai le Atua ia i tatou.

Risatisone Taua

Malua Literacy

I le faaaloalo tele, e tuuina atu ai se ripoti e tusa ma galuega a le vaega o le Malua English Literacy Program i lenei foi vaituuaga.

O le faamoemoe lava o lenei polokalame, o le fesoasoani, ma faaleleia atili le faitau o alo ma fanau, i le gagana Peretania, e pei ona aoaoina i le Aoga ma Kolisi Mauualuluga. E i ai le talitonuga ma le naunautaiga, ina ia uuna'i pea tamaitiiti, ina ia faaleleia le faitau i le gagana Peretania, aua le faamoemoe mo nisi laasaga i le soifua aoaoina o le tamaitiiti.

O tamaiti mai le lima tausaga seia oo i le sefulu tausaga le matutua o loo auai i lenei polokalame. E toa tolu sefulu fitu tamaiti o loo iai i le Malua literacy program mo lenei vaituuaga.

O loo i ai le faletusi a lenei polokalame, o loo maua ai le tele o tusi faitau, mo soo se tausaga (age group) e mafai ona ave tusi e le tamaitiiti ma toe faafoi, ina ia faamasani pea le faitau i o latou aiga.

I lenei polokalame, o loo naunautai pea faiaoga ina ia faamalosia lava le alualu i luma le latou faitau tusi faaperetania.

E faafetaia ai pea le Alii Pule o le Kolisi, ma le faletua, faapea foi le lagolagosua o matua, i lenei polokalame, aua le lumana'i manuia o alo ma fanau. E faafetaia foi faletua o aoao o loo fesoasoani tele i le faamaopoopoina o lenei faamoemoe.

Faafetai

Lemau Pala'amo, Amelia Setefano, Tanaria Kolia
Malua English Literacy Program

Taaloga Aoao ma Faletua

O taaloga o lenei vaituuaga na o le Soka ma le Touch Rugby. O le polokalame taalo o Aso Tofi taitasi ma e aofia ai uma a'oa'o faapea faiaoga. E lua au e vaevaeina i ai; Black ma le White ma e taaalo i vaega tolu; A, B, C. Tau fai naunau uma au e lua i vaega taitasi ma e tele ina finau lava le manumalo i le tele o taaloga. Na matauina le alualu i luma o le fiafia e taaalo i le maea o vaiaso e tolu muamua o le aoga, ina ua maua se suiga o le malos i a'oa'o mai galuega, touch ma le Tabata (faamalosi tino) e faia i afiafi. O le au a le Black ua manumalo i le tuufaatasiga o taaloga o le kuata muamua.

Sa faaaauuina foi le soka faitele i le va o A'oa'o fai aiga ma A'oa'o nofo toatasi i Aso Lua taitasi pe a maea galuega. O le au a A'oa'o nofo toatasi o lo'o sili a latou malo i lea polokalame. O le autu lava, ia maua pea le faamalosi tino, le fiafia ma le tausia o le soifua maloloina lelei. Maua ai foi ma le fiafia e taaalo faatasi, aoaoina le tutu faatasi (team work) ma le agaga faamalosi au i le isi uso.

Iese Uele



Pa Povi



I le ava ma le faaaloalo e tatau ai, e tuuina atu ai lenei ripoti faa le tausaga o le lafu manu papalagi a le Kolisi FaaFaifeau i Malua i lenei tausaga 2017. O se tasi nei o atina'e a le Kolisi ua loa tausaga o faatinoina, ma o loo tumau pea le faatauaina o lenei atinae aoga mo faamoemoega o le Kolisi FaaFaifeau i Malua.

O loo ua tofia faapitoa susuga i Faifeau Faiaoga ma susuga i aoao, o loo nafa ma le vaaia o le malu puipuia o le atinae, aemaise lava o le mautinoa ai o le agai pea i luma o le taumafaiga o lenei faamoemoe.

Aofaiga o Manu Papalagi

E o'o mai i le tuuaga o le vaituuaga muamua 2017, ua oo i le 19 manu papalagi, e mai lea aofaiga e aofia ai:

10 povi po'a (2 sikia, 5 po'a, 3 pulu)

9 povi fafine (5 aumatua, 4 taanoa)

E valu pa ua maea ona vaevaeina e faata'a ai le lafu, ma ua matua malua puipuia le pa i ona itu uma, ua maea faafouina le uaea ma ua maea faamama foi le vao e le manaomia e manu. Ua amataina nei se tasi o taumafaiga a le susuga i le taitai ma le vaega a le pa povi e ala i le toe totoina o le vao povi fou mai i le ofisa Faatoaga mo le faamoemoe e mafai ona tape ai le vao le manaomia ma ia soo uma le pa i lea vao mo meaai a manu.

O loo lelei atoatoa foi le faatanoa vai o loo faalepa ai le vai mo manu.

O le ripoti lena o le atinae manu papalagi a le Kolisi Faafaifeau i Malua 2017

Faau BJ Faau



Maumaga

E manatu e le o toe po malae i le toe lalagaina o le itu i gauta o le Kolisi e ala i faatoaga e pei ona amataina i le tausaga ua tuanai. Ao sina ripoti puupuu lava i le gasologa o galuega o lenei kuata ma le tulaga o loo iai taumafaiga a le kolisi e ala i ana faatoaga.

E maea le tausaga na tea nei (2016), ua maea ona faia asiasiga se lua e tai 1000 tiapula ma fualama taamu NiuKini e tai 100. O le asiasiga muamua ua mafai ona faaogaina e pei ona amata mai ai i le masina o Mati i le tausaga nei. Ua tele lava le alualu lelei i luma o faatoaga ma le io lelei o talo pe a faatusatusa i le tausaga ua tuanai. Sa faaogaina lava le malosi o le kolisi e faatino ai fuafuaga masani i le itu tau taumafa ae faapea auai taitasi ia latou suavai i Aso Sa. O le isi toaga poo le asiasiga o loo iai mai le tausaga na tea nei ua fuafuaina mo le Mafutaga Faafouina ma le Fauuga. Ua manatu lenei komiti ua fetauai lelei lea fuafuaga ma o le a tele foi se fuauli o le a maua aua ia faamoemoe taua.

Ae i le a'e mai o lenei tausaga (2017), sa faia ai foi le asiasiga o tiapula tai 1000 a le auai ma ua matauina le ola lelei o ia toaga. O loo fai lava ma fai asiasiga e le gata o le totoina ao le faamamaina foi ina ia tumau pea le ola lelei ma vave ona tulai mai i se tulaga lelei faatoaga.

Ao le tulaga lava ia o le fuauli, ua matua tele lava ma ua lelei mo le fofoga taumafa. O lea e faafetaia ai le alofa ma le agalelei o le Atua i le malosi ma le ola ua mafai ai ona faataunuuna fuafuaga uma e pei ona sa fitaituga iai le kolisi e ala i ana faatoaga. E viia ai le foi le alofa o le Atua ona o le soifua ma le ola o le Komiti o Maumaga, Dr VaitusiNofoaiga, Dr Arthur Wulf ma Apineru Fasavalu ona o le lelei fuafuaina o galuega aua lava le agai i luma o maumaga a le Kolisi.

Faamoana Leaupepe (Sui o Aoao i le Komiti)

Vaaiga Eseese I le Kolisi



Pre-School

O sina faamatalaga lenei i faafuaga sa faagasolo a le aoga faataitai (Maluapapa Pre-School). Na amatalia le aoga i le Aso Gafua, 13 Fepuari. E toa luasefulu (20) tamaiti o le aoga, e toa valu (8) tama, ae toa sefulu ma le lua (12) teine. O tamaiti fou na faaulu mai e toa fa (4). O se mafutaga matagofie ma le agamalie i nisi o taimi.

O le Aso Gafua e agai atu i le Aso Tofi, o aso aoga ia. A o le Aso Faraile o le latou aso taalo lea. O le 8.30 i le taeao e amata ai le aoga i le Aso Gafua agai i le Aso Lulu, ma tuua i le 11.00 i le aoauli. O le Aso Tofi, e amata i le maea ai o le Aoga Lauga, ae tuua i le 1.30 i le aoauli. A o le Aso Faraile, e amata i le 8.00 i le taeao, ae tuua i le 10.30 i le taeao lava.

O le faagasologa masani o se aso aoga, e amata lava i le lotu e faia lava e le fanau, ae fesoasoani i ai faiaoga. Ona sosoo ai lea ma le asiasiga o atigilima ma o latou solosolo, ina ia faamamafa ai lava le tu mama o tamaiti. Ona fai lea o le tauvalaauga, ma sosoo ai ma a latou pesepesega ma tauloto. A maea ona fai lea o le latou fruits, sosoo ai ma le mataupu ia saunia e le faioaga tofia o lena aso, faatasi ai ma le latou galuega faatino. E tapena lava e faiaoga (o faletua o faiaoga ma aoao) mataupu mo le fanau i aso taitasi. Ona sosoo ai lea o le lunch. O le naunautaiga a lenei Aoga, o le tausi o le soifua maloloina, ma e matuai faasaina se tuisi ma vai suamalie, ae na o mea ai paleni lava. A maea le lunch, ona faitauina lea e se faiaoga se tuisi e faafilemu ai le fanau seia oo ina maea le aso. O Aso Faraile e pei ona ta'ua, o aso taalo, ma e masani foi ona faia ai zumba ina ia maua ai pea e le tamaitiiti le maloloina lelei o le tino.

O le kuata foi lenei sa faamanatuina ai e le fanau le Eseta, ma na faatinoina ai foi e faiaoga le tala i le maliu ma le toetu manumalo mai o lo tatou Alii Faaola o Iesu Keriso. O le aso 19 Aperila na tuua ai le Kindy mo le kuata muamua.

O faletua o faiaoga o Lotu Latai ma Mile Nofaiga, o loo faauluulu i ai le Maluapapa Pre-School. E toa sefulu (10) faletua o aoao na tofia e galulue i le aoga.

Fesuea'i Panapa

Taaloga Tagapolo 2017



Taaloga ma Ausetalia

Sa faataunuuina i le Aso Faraile 12 Me i le 7 i le taeao. Na amata i le tatalo, sosoo ai ma le malu taeao na saunia e le au a Malua, ona faagasolo ai lea o le taaloga. E iva au a Ausetalia ae sefulu tasi au a Malua. Sa iai foi tauvaga faapitoa e pei o le 'longest drive', ma le 'closest to the pin'. O taavale ma green fees na feagai ma le au a Ausetalia.

Na faataunuuina le laugatogi ina ua maea uma taaloga a au sa auai. O faailoga o lea aso na saunia e le au a Ausetalia. O le tuufaatasiga, o ai na maua e le au a Malua e 693 ae o Ausetalia, e 685. Ma ua manumalo ai i lenei tausaga ma see atu ai le ipu o le siamupini i le au a Ausetalia. Na faaiu i se taumafataga na saunia e Malua, sosoo ai ma upu faafetai ma le faamalo a Kapeteni o au e lua. Na tauaoina ai foi le meaalofo tupe a le au a Ausetalia mo Malua, ona faaiu ai lea i le tatalo na saunia e le

Kapeteni a Ausetalia, Aviti Etuale (FT) ma lulu aao ai seia toe aulia le Fonotele o le la tausaga i le alofa o le Atua.



Taaloga ma Niu Sila (Matagaluega Aukilani ma Manukau)

O le tausaga muamua lenei ua faatinoina ai le taaloga lenei ma le au mai le Matagaluega a Aukilani ma Manukau, o nisi foi ua iloga ma ua leva ona taaalo i le taaloga. O le taeao o le Aso Faraile 19 o Me na faatinoina ai lenei faamoemoe. Sa amata lava i le tatalo na saunia e le Toeaina ia Lucky Slade, ona sosoo ai lea ma le malu taeao na saunia e Malua. O le taina o le tee off muamua e amata aloaia ai lenei mafutaga sa taina e le Toeaina ia Lucky Slade. Sosoo ai loa ma le gasologa o taaloga e pei ona faat-ulagaina e le Komiti mai au e lua.

O le maea ai o le taaloga, na faia ai se faamalositino na saunia foi e Malua. O le laugatogi na saunia uma faailoga e le au mai Niu Sila. O i latou foi sa feagai ma le totogina o green fees ma taavale sa faatino ai le taaloga. O le ipu tauoloa mo le siamupini na saunia foi e le au mai Niu Sila aua o lea faatoa faia lenei taaloga.

I le faaiuga o le taaloga na maua ai e Malua ai e 917 ao Niu Sila ai e 908. Ua manumalo ai nei le au mai Niu Sila i le ipu o le siamupini o lenei tausaga. Na tauaoina ai foi e le au a Niu Sila se meaalofo tupe mo le au a Malua. Na faaiu lenei aso fiafia i le tatalo na saunia e le Toeaina ia Lucky Slade. Ona lulu aao ai lea seia toe feiloai foi i luga o le malae i lea Fonotele.

E faafetaia ai foi le lagolago a le susuga Fata Ueli ma le kamupani a le Oceania Communications i le saunia ai o le toniga matagofie a Malua i le taaloga ma Ausetalia; le susuga a Lomi Tomane ma le kamupani a le Tisaan mo le lolomi-na o le toniga sa faaogaina i le taaloga ma Niu Sila. Faapea le Kamupani a Uncle Johnny, Fatitu Wholesale ma le Kaisara Real Estate. Ia faamanuia le Atua i galuega o feagai ai aemaise le agalelei ma le fesoasoani mai.

Komiti o le Maluapapa

Aukilani Tui, Makesi Neemia, Apineru Fasavalu, Reupena Maulolo
Panama Pouono, Brian Fiu Kolia, Sega Asafo
Malua Theological College
www.malua.edu.ws
© 2017